



Inatsisartunut ilaasortamut
Mariane Paviasen, Inuit Ataqtigiit
E-mailikkut nassiunneqarpoq uunga inatsisartut@inatsisartut.gl

Ilanngaaserisut pillugit § 37 naapertorlugu apeqquteqaammut 2023-119-imut akissut

21-07-2023

Sulilap nr. 2023 - 19097

§ 37 naapertorlugu apeqquteqaammut matuma siuliani taaneqartumut akissut nassiunneqarpoq. Akissummut atugassanik Akileraartarnermut Aqutsisoqarfimmit ilassutissanik piniartoqarpoq.

Postboks 1037

3900 Nuuk

Tlf. (+299) 34 50 00

Fax (+299) 34 63 50

E-mail: oed@nanaoq.gl

www.naalakkersuisut.gl

Apeqqutit akissuteqarfigineqannginneranni matumani ilanngaaserisut sulinerat ataatsimut isigalugu nassuiarneqarpoq, tassami apeqqutinut akissuteqarnissamut killissaliinissamut, tamanna siunertamut iluaqutaasutut isigineqarmat.

Ilanngaaserinermut suliassaq Akileraartarnermut Aqutsisoqarfimmi Ilanngaaserisunit, Nuummi, Kangerlussuarmi Ilulissanilu allaffeqartunnit, isumagisarineqarpoq. Ilanngaaserisut suliassaraat nioqqutissanik akitsuuserneqartussaataasunik eqqussuinerinik nakkutiginninnissaq, akitsuutinik akiligassiisarnissaq, aanngajaarnartunik allanillu inatsisinik unioqqutitsisunik anngiortumik eqqussinissamik pinngitsoortitsinissaq kiisalu inunnik, allakkanik usinillu avammut angallanneqartunik nakkutiginninnissaq. Tassani ilaatinneqarput imaatigut silaannakkullu usinik assartuussineq, kilisaatini suliagarnerit allatigullu umiarsuarmik, allakkatigut timmisartumillu angallannerit. Sumiiffinni ilanngaaserisut nammineerlutik najuuffiginngisaanni ilanngaaserinermi suliassaq isumaqatigiissuteqarneq malillugu suliffeqarfinit akuerisaasunit ingerlanneqarpoq. Maannamut pingaartumik Tusass A/S aamma Mittarfeqarfiit isumaqatigiissuteqarfigineqartarsimapput.

Kalaalit Nunaannut aammalu Kalaallit Nunaannit inuit angallanneqarnerat pingaartumik mittarfinnut tallimanut taakkunanngaaniillu timmisartumik ingerlasarpoq: Narsarsuaq, Kangerlussuaq, Ilulissat, Nerlerit Inaat aamma Kulusuk. Usinik assartuussineq timmisartumik imaluunniit umiarsuit containerinik imaluunniit umiarsuarni allani usinik usisartuni imaatigut ingerlanneqarpoq. Nakkutiginninnissamut suliassaq Kalaallit Nunaanni nunami sumiiffinnit, nunamut aammalu nunamiit aqutissat siammarsimassusaannit kiisalu attaveqaasersuutit imaatigut silaannakkullu assartuussinermik aallaaveqarnerannit ajornakusoortinneqarpoq. Aamma aalisarnermi takornariartitsisarnermilu suliqaartut kilisaatinik umiarsuarnillu angallannerat annertuvoq, ilanngullugit umiarsuit takornariartaatit nuaannaariartaatillu, tamatumalu nakkutiginninnermi suliassaq annertunerusumik pisariusunngortippaa.

Kalaallit Nunaata angissusaa innuttaasullu siammarsimassusaat pissutigalutit ilanngaaserisut nakkutiginninnerat pingaartumik paasiniaanernik misissugassanillu tiguisarnermik aallaavillimmik ingerlanneqarpoq. Akileraartarnermut Aqutsisoqarfik aamma Danmarkimi Toldstyrelsen akornanni nioqqutissanik inunnillu misissuisarneq

kiisalu paasissutissanik paarlaasseqatigiittarneq pillugit suleqatigiittoqarpoq. Sumiiffinni aalajangersimasumik suliffiusanngitsuni misissuiartortut qimmillu ukiup qanoq ilinerini suliaortortinneqartarput, pingaartumik Nuummeersuusarlutik. Tamatuma saniatigut Tusass A/S, illoqarfinni Akileraartarnermut Aqutsisoqarfiup najuuffiginngisaanni ukioq kaajallallugu nakkutiginninnermut oqartussat, suleqatigiinnissamut isumaqatigiissuteqarfigineqarpoq.

Isumalluutit nunanit tamalaanit tikiffiusartuni pingaarnersiuiinermi atorneqarput, pingaartumik Kangerlussuarmi, Ilulissani aamma Nuummi mittarfinni, kiisalu Nuummi umiarsualivimmi, tassani nioqqutissat inatsisinik unioqqutitsisut pingaartumik taakkua aqqutigalugit anngiortumik eqqunneqartarmata. Tamatuma saniatigut aasaanerani nunanit tamalaanit timmisartuussinerup nalaani Narsarsuarmi mittarfik pingaarnersiuiinermi salliutinneqartarpoq. Atuutereersut saniatigut illoqarfinni allani ilanngaaserisoqarfinnik aalajangersimasunik pilersitsinissamik Naalakkersuisut maannakkut pilersaaruteqanngillat, kisianni ilanngaaserisut aalajangersimasumik suliaortortinneqartartut inissisimaffii ingerlaavartumik naliliiffigineqartarput, pingaartumik mittarfiit allilerneqarnissaannut pisussamut atatillugu. Isumalluutinik atugassiisarneq taamaalilluni nakkutiginninnermi allanngortoqassappat iluarsineqartarput.

Usinik nakkutiginninneq pingaartumik Nuummi ingerlanneqarpoq, tassani usit sumiiffinnut allanut ingerlateqqillugit nassiunneqannginneranni misissorneqartarlutik, ilanngullugu Narsaq. Umiarsuarnik nakkutiginninneq pingaartumik misissugassanik tiguisarnikkut aammalu paasiniaanerit aallaavigalugit ullumikkut ingerlanneqarpoq.

Kiisalu nunatta killeqarfiisigooreernerup kingorna nakkutiginninneq politiit akisussaaffigimmassuk erseqqissassallugu pingaaruteqartorujussuuvoq. Akileraartarnermut Aqutsisoqarfiup aanngajaarniutinik anngiortumik eqqussisarneq akiorniarlugu akitsuutitigullu nakkutiginninnerup ingerlanneqarnerani, najukkani suleqatigisartakkat, soorlu Tusass A/S aammalu najukkani politiit, qanimut suleqatigai.

Apeqqutigineqartunut akissuteqaat

Matuma kinguliini apeqqutit ataasiakkaarlugit issuarneqarput, akissutitaqarlutik.

1. Qanga Narsap illoqarfiani akitsuuserisoqarunnaarsitsisoqarpa?

Naatsorsuutigineqarpoq Tusass A/S aamma Akileraartarnermut Aqutsisoqarfiup akornanni Narsamut tunngatillugu suleqatigiinnissamut isumaqatigiissutaat qanga atorunnaarsinneqarsimanersoq apeqqutigineqartoq, naatsorsuutigineqarpoq.

Tusass A/S-ip ulloq 1. maj 2023 atuutilersumik suleqatigiinnissamut isumaqatigiissut atorunnaarsippaa.

a. Suna pissutigalugu akitsuuserisoqarunnaartitsisoqarpa?

Tusass A/S-ip aamma Akileraartarnermut Aqutsisoqarfiup akornanni Narsamut tunngatillugu suleqatigiinnissamut isumaqatigiissut sooq atorunnaarsinneqarsimanersoq apeqqutigineqartoq, naatsorsuutigineqarpoq.

Tusass A/S-ip sullitaminik sumiiffiini sullissinermit ingerlatsinermit ilusiliinini allanngortinniarlugu aalajangersimavoq. Tamatuma malitsigisaanik Akileraartarnermut Aqutsisoqarfimmut suleqatigiinnissamut isumaqatigiissut atorunnaarsinneqarpoq. Taamatut allanguineq, inuiaqatigiit kalaallit ineriartorlutik digitalinngortitsinerulertoqarlunilu nalinginnaasumik takuneqartartunut ilaatillugu pivoq, tamatumalu ilaatigut malitsigisaanik nalinginnaasumik allakkat nassiunneqartartut ikinnerulersimapput.

Ilanngaaserisut ingerlaannaq nakkutiginnittarnerisa Tusass A/S-imit ingerlanneqartup, siusinnerusukkut Narsami allakkerivimmi ersarissuusimasup, atorunnaarnera, Tusass A/S-ip isumaqatigiissummik atorunnaarsitsinerata ajoraluartumik kinguneraa. Taamaattoq nioqqutissat allakkallu Narsamukartut ilanngaaserisunit misissorneqartarunnaarnerannik tamanna kinguneqanngimmat, erseqqissassallugu pingaaruteqarpoq. nakkutiginninneq maannakkut nunatsinni sumiiffinni allani ingerlanneqartaliinnarpoq. Taamaakkaluartoq Tusass A/S-ip maannakkut suleqatigiinnissamut isumaqatigiissummik atorunnaarsitsinera soorunami Akileraartarnermut Aqutsisoqarfiup ilanngaaserinermit suliassaqarfimmi qisuariaatinik iliuusissanillu naliliinissaanik pissutissaqalersitsivoq. Akileraartarnermut Aqutsisoqarfiup ilanngaaseriveqarfiata taamaalilluni, nakkutiginninnissamik isumalluutinillu pisariaqartitsineq apeqqutaatillugu, nunatsinni sumiiffinni assigiinngitsuni sulisunik pisariaqartitsineq ingerlaavartumik nalilersortarpaa. Tamanna aamma Tusass A/S-imik suleqateqarnerup allanngorneranut atuuppoq, tassani maannakkut ilanngaaserinermit suliassaqarfimmi suleqatigiinnissamut isumaqatigiissutinik nutaanik isumaqatigiissuteqarnissamut pisariaqartitsineq misissorneqarluni naliliiffigineqarlunilu.

2. Narsap illoqafiani akitsuuserisunik atorfinitsitsinissamik Naalakkersuisut pilersaaruteqarpat?

Aallarniutigalugu akissuteqaammi siullerpaani ataatsimut isigalugu nassuiaat innersuussutigineqarsinnaavoq.

Tassunga ilanngunneqarsinnaavoq, Naalakkersuisut maannakkorpiaq Akileraartarnermut Aqutsisoqarfiup ilanngaaseriveqarfianut aningaasaliissutit qaffanneqarnissaat pillugu Inatsisartunut qinnuteqarnissamik pilersaaruteqanngillat.

Inoqarfimmi ilanngaaserisunik aalajangersimasumik najuuttoqarnissaanut minnerpaamik ataatsimik, pitsaanerussallunilu marlunnik, sulisoqartariaqarpoq. Inoqarfippassuarnut tunngatillugu, ilanngullugu Narsaq, ilanngaaserisunik aalajangersimasumik najuuttoqarnissaata naapertuilluartuunissaanut suliassat naammattumik annertussuseqanngillat.

Suliassat aalajangersimasut najuuttoqarnissaanik tunngavissiitinnagit, tamatumunnga taarsiullugu aaqqiissutissamik sulissutiginnittoqartarpoq, tassani suleqatissamut sumiiffimmi najuutereersumut suleqatigiinnissamut isumaqatigiissut, sumiiffinnit allaniit ilanngaaserisut suliaqarnissaannut, ataqatigiissinneqartarluni.

a. Taamaattoqarpat qaqugu?

Takuuk apeqquummut 2-mut akissut.

b. Taamaangippat sooq Narsap illoqarfiani akitsuuserisut amerlanerusut atorfinitsinniarneqangillat?

Aallarniutigalugu akissuteqaammi siullerpaani ataatsimut isigalugu nassuiaat innersuussutigineqarpoq.

Takuuk apeqquummut 2-mut akissut.

3. Akitsuuserisut illoqarfinni suni amigaataappat?

Akissuteqaammi siullerpaani ataatsimut isigalugu nassuiaatit aammalu apeqquummut 1-imut akissut innersuussutigineqarput.

a. Sumiiffinni akitsuuserisoqangiffiusuni akitsuuserisunik atorfinitsitsinissamik Naalakkersuisut pilersaaruteqarpat?

Akissuteqaammi siullerpaani ataatsimut isigalugu nassuiaatit aammalu apeqquummut 1-imut akissut innersuussutigineqarput.

b. Taamaangippat sooq akitsuuserisunik amerlanerusunik atorfinitsisoqarniannila?

Akissuteqaammi siullerpaani ataatsimut isigalugu nassuiaatit aammalu apeqquummut 1-imut akissut innersuussutigineqarput.

4. Naalakkersuisut akitsuuserisut pillugit suliamut soqutiginartunik annertunerusumik paasisutissiisinnaappat?

Naamik.

Tamatuma saniatigut akissuteqaammi siullerpaani ataatsimut isigalugu nassuiaatit innersuussutigineqarput

Inussiarnersumik inuulluaqqusillunga


Naaja H. Nathanielsen